



Farqona haqiqati

Ijtimoiy-siyosiy, ma'naviy-ma'rifiy gazeta



<http://farhaqiqat.uz/>



t.me/farhaqiqati



ФАРҒОНАЛИК ПАХТАКОРЛАР ШАРТНОМА РЕЖАСИНИ БАЖАРДИ

Бу йил 77 000 гектар ерда деҳқончилик қилган вилоятимиз пахтакорлари 290 000 тонна сифатли ҳосил йиғиштириб олиб, шартнома режасини ортиғи билан бажардилар. Ҳосилдорлик гектарига ўртача 37,7 центнерданни ташкил этди. Ҳали далаларда ҳосил бор. Йиғим-терим давом этмоқда. Ялпи ҳосил 350 000 тоннага, ўртача ҳосилдорлик эса гектарига 45 центнерданга етиши кутилмоқда.

Муқимжон ҚОДИРОВ олган сурат.



ҲАМАС қандай ташкилот?

Маълумки, жорий йил 7 октябрь куни эрталаб Ғазо секторидан Исроил ҳудудига ракета ҳужуми бошланди. Кейинчалик ҲАМАС Исроилга қарши "Ал-Ақсо тўфони" ҳарбий операцияси бошланганини эълон қилди. Исроил мудофаа кучлари эса бунга жавобан "Темир қиличлар" "аксилтеррор операцияси"ни амалга оширди. Шу тариқа Яқин Шарқда қирғинбарот уруш авж олди. Биз юқорида тилга олган ҲАМАС қандай ташкилот? Энди урушнинг тугаши нимага боғлиқ? Бу саволларга таниқли сиёсатшунос Камолиддин РАББИМОВ шундай жавоб беради.

7-бетда



18 октябрдан бошлаб Фарғона халқаро аэропортидан Саудия Арабистонининг Жидда шаҳрига тўғридан-тўғри авиақатновлар йўлга қўйилди.

МЎЪЖИЗАЛАР ОСМОНДАН ТУШМАЙДИ



Ёхуд Хитой тараққиётининг сирлари ҳақида

Хитойликларнинг феълени билиш учун аввало уларнинг қуйидаги мақолларини ўқиш керак деб ҳисоблайман: "Ўқиб туриб фикр қилмаслик – аҳмоқлик, фикр қилиб ўқимаслик – фожиа", "Савдода энг муҳими – пулни санаш, деҳқончиликда – эрта туриш", "Ўғрилиқ пиёз ўғирлашдан бошланади", "Ҳатто энг баланд тоғ ҳам куёшни тўсолмайди", "Савдодан топилган мол – ўттиз йилга, тер ва қон билан топилган мол – минг йилга".

Ана шу нуқтаи назарга эга бўлган эл яратган мўъжизалар ҳақида дунё тарихчилари, адиб ва сиёсатчилари томонидан кўп ва хўб ёзилган. Назаримда, бу мамлакатнинг Шарқда, кунчиқарда, тагин океанга яқин жойлашувининг ўзи мўъжиза. Бунинг бизда "Худонинг назари тушган", дейишади.

4-бетда

Долзарб мавзуда



УЗУМНИНГ НАРХИ НЕГА ҚИММАТ?

Узумчилик, бу – халқимизнинг асрлар давомидаги миллий деҳқончилик маданияти, қадрияти, ғурури ва даромад манбаи ҳисобланади. Узум халқимизнинг турмуш тарзи ва урф-одатлари билан бевосита боғлиқ кетган. Ҳар бир кўчада, хонадонда ток бўлган. Қолаверса, узумчиликнинг иқтисодий самарадорлиги ҳам, ижтимоий аҳамияти ҳам катта. Айни кунларда Фарғона шаҳридаги марказий деҳқон бозори расталарида олтиндек товланаётган "хусайни", "каттақўрғон", "келин бармоқ" навли узумларнинг 1 килограмми 30-35 минг, "мерседес" нави 60 минг сўмдан сотилмоқда. Бунинг сабаби нимада? Ҳосил камлигидами ёки бошқа сабаб борми?

Шундай саволлар билан бозордаги сотувчи, харидор ва соҳа мутахассисларига мурожаат қилдик.

3-бетда

21 октябрь – Ўзбек тилига давлат тили мақоми берилган кун

Инсонни ғурур ва ифтихор доимо юксалтиради. Президентимизнинг БМТ Бош Ассамблеясининг 78-сессиясида ўзбек тилида нутқ сўзлагани ҳам ҳар бир юртдошимизга шундай куч ва руҳ бағишлади. Ўзбек бўлганлигимиздан, шу тилда сўзлаётганимиздан ғурурландик. Ўзбек тилининг оҳанрабои, сеҳри ҳар бир юракка етиб борди, десак янглишмаймиз.

Рости, яқин йилларда ҳам жаҳон минбарларида ўз она тилимизда гапиришдан уялганлар бўлди. Бундан кўз юмиб бўлмайди. Бугун эса бари ўзгарди, ўзбек тилининг жаранги дунё минбарларини забт эта олди.

Миллатларни ажратиб турувчи асосий белгилардан бири тил экан, ҳар бир инсон ўз тилини билиши, уни улуғлаши ва шу билан бирга, бошқа миллатларнинг она тилига ҳам ҳурмат билан қараши лозим. Шундагина тилнинг, миллатнинг қадри ва обрўи, нуфузи ошади. Тил тарихини, унинг меъёрий нукта назардан шаклланиш жараёнини, ривожланишини миллат тарихидан айри ҳолда ўрганиб бўлмайди.

Барчамизга маълумки, 1989 йилда қабул қилинган "Давлат тили ҳақида"ги қонунга асосан, ўзбек тили Ўзбекистон Республикасида ягона давлат тили сифатида тан олинди. 1995 йил 21 декабрда қонун янги таҳрирда қабул қилинди. 2020 йилдан эса 21 октябрь санаси – Ўзбек тили байрами кунини сифатидан нишонланмоқда.

Ўзбек тили миллий ўз-лигимиздир. Ўзбекистон Республикаси Конституциясида давлат тилининг

мақоми ҳуқуқий жиҳатдан мустақамлаб кўйилган. Шу тариқа ўзбек тили мустақил давлатимизнинг Байроғи, Герби, Мадҳияси қаторида турадиган, қонун йўли

изки, "Давлат тили ҳақида"ги қонун она тилимизнинг бор гўзаллиги ва жозибасини тўла намоён этиши билан бирга, уни илмий асосда ривожлантириш борасида ҳам кенг имкониятлар яратди. Олимлар ва мутахассислар томонидан илм-фан ва турли соҳаларга оид энциклопедия ва луғатлар, дарслик ва ўқув қўлланмалари чоп этилди.

Ўзбек тили байрамига бағишланган тадбирларда "Давлат тили ҳақида"ги



БАРЧАМИЗНИНГ ҒУРУР ВА ИФТИХОРИМИЗ

билан ҳимоя қилинадиган муқаддас давлат рамзига айланди.

Истиклол йилларида мамлакатимизда барча соҳаларда бўлгани каби тилимиз тараққиётида ҳам муҳим ўзгаришлар юз берди. Ўзбек тилининг халқаро миқёсда обрўси ошиб, фаол мулоқот воситасига айланиб бормоқда. Турли даражадаги расмий учрашув ва музокараларда тилимиз кенг қўлланаётгани, хориждаги қатор таълим даргоҳларида, илмий муассасаларда ўзбек тили марказлари ташкил этилиб, уларда она тилимизни ўрганишга қизиқувчилар сони кўпайиб бораётгани бунинг яққол далилидир.

Шуни ҳам таъкидлаш жо-

қонуннинг ижроси юзасидан амалга оширилаётган ишлар атрофлича таҳлил этилиб, галдаги вазифалар белгилаб олиниши яхши анъанага айланган.

Давлат ва жамоат идораларида иш юритиш, ҳужжатлар тайёрлаш, ариза ва маълумотлар қабул қилиш, турли мажлис ва амалий анжуманларни ўтказиш давлат тилида олиб борилмоқда. Қувонарлиси, хорижий мамлакат раҳбарлари билан бўладиган учрашув ва суҳбатлар, музокаралар, тегишли ҳужжатларни имзолаш маросимларида, халқаро саммит ва матбуот анжуманларида ўзбек тилининг ўрни ва аҳамияти ортиб бораётганини кузатиш мумкин.

Мамлакатимизнинг барча жойларида бўлганидек, Фарғона вилоятида ҳам "Давлат тили ҳақида"ги қонуннинг ижросини таъминлаш, ўзбек тилининг бой имкониятларини тадқиқ этиш борасида кенг қўламли ишлар амалга оширилмоқда. Биргина Фарғона давлат университетида ўтган йилларда ўзбек тили йўналишида эллиқдан зиёд докторлик ва номзодлик диссертациялари ҳимоя қилинди. Мазкур университет ва Қўқон давлат педагогика институтида ўзбек тили бўйича илмий даражалар берувчи Илмий кенгаш фаолият кўрсатиб келмоқда.

Маҳалла ва кўчаларни, хиёбону майдонларни беэза турган ўзбекча номлар,

шиор ва ёзувларни кўриб, қалбимиз фахр-ифтихорга, ғурурга тўлади. Мустақиллик, Обод турмуш, Раққон, Зоҳидон... Бундай номланишларни кўп келтириш мумкин. Бугун бу сўзлар ҳар кунги ҳаётимизда бир неча маротаба такрорланмоқда. Жаҳон ареналарида мадҳиямизнинг ўзбек тилида жаранглаши қалбимизни чексиз ғурур-ифтихорга тўлдирмоқда. Кеча ким эдигу, бугун ким бўлганлигимизни ёдимизга солиб турибди.

Ўзбекистонимиз якка-ю ягоналигини, шу юрт, шу она замин биз учун, келажак авлод учун аталганлигини ҳис қилиб турибмиз. Мана шу улуғ туйғу ҳар биримизнинг дилимизга жо бўлмоқда. Янги Ўзбекистоннинг тараққиётида она тили ҳам муҳим ўрин эгаллаб, бугун янада мавқеи ошиб бормоқда.

**Соҳибжамол
ТОНГАТОВА,
Фарғона вилояти ҳокими
маслаҳатчиси.**

Гўдак дунёга келиши билан ўзига хос ингроқли товуш чиқариб йиғлайди. У ўзигагина аён тилда нималарнидир тушунтирмақчи бўлади. Кун сайин улғая бошлагач, аввал товушлар, кейин сўз ва гап орқали фикрини бошқаларга тушунтиради.

Қизиғи шундаки, ҳар бир инсоннинг тили онаси унга сўзлаётган ва алла айтган тилда чиқади. Миллати қандай бўлишидан қатъи назар, албатта. Бежизга бешиқданок қон-қонимизга синган тилни "она тили" дея эътироф этмаймиз.

Онага менгзалган тил шуниси билан қадрлики, она ўз фарзандини меҳр билан авайлаб-асраганидек, тил ҳам миллатидан ана шу каби эъзозни талаб этади.

Машҳур авар шоири Расул Ҳамзатовнинг "Менинг Доғистоним" асарида шундай қайдлар учрайди: муаллиф Парижда доғистонлик рассомни учратиш қолади. Рассом инқилобдан кейин Италияга кетган, ўша жойда уйланган ва юртига қайтмаган. Ёзувчи Париждан қайтгандан сўнг, Доғистондан рассомнинг яқинларини излаб топади. Шоядки, рассомнинг онаси билан суҳбатлашишга муяссар бўлади. Она "Ўғлим билан аварчада гаплашдиларингми?" дея сўрайди. Муаллиф рассом билан таржимон орқали гаплашишгани, у русча, рассом французча гапирганини айтгач, она юзига қора пардасини туширади. Одатда, авар миллатига мансуб оналар ўз ўғлининг ўлганини эшитганда шундай қилишади.



– Расул, сен янглишибсан, менинг ўғлим аллақачон ўлган экан. Агар ҳаёт бўлганда, авар онаси ўргатган тилни унутмаган бўларди, – дея надомат чекади она.

Дарвоқе, бугунги кунда бир нечта тилни билган ва шу тилда бемалол сўзлаша олаётган инсонга "маданиятли" дея таъриф берамиз. Аммо зарурат бўлмаса-да, она тилида эмас, рус ёки инглиз тилида сўзлаётган инсонни маданиятли деб ҳисоблаб бўлмайди. Тўғри, бугунги глобаллашув даврида чет тилларга

бўлган эҳтиёж ёшларимиз орасида жуда юқори. Бу эҳтиёжнинг "фақат чет тилида сўзлаш керак холос" каби нотўғри талқин этилиши, ўзбек

тилининг бирмунча қадрсизланишига олиб келади.

Инсониятга Яратган томонидан ҳадя этилган энг муқаддас хилқат – ўз она тилидир. Баъзан ойинаи жаҳон орқали ўзбек миллатига мансуб бўлса-да, машҳур инсонларнинг рус тилида гапириши ёки ўзбек тилини бузиб талаффуз қилишини кўриб, ачиниш кетасан киши. Она тилига бўлган ҳурмат шу бўлса, улардан бошқа нимани кутиш мумкин? Ҳозирда йўқолиб бораётган

тилларни тадқиқ қилиш борасидаги изланишларим натижасига кўра, тилнинг йўқолиши, ўз навбатида, миллатнинг ҳам йўқолиб кетишига замин яратар экан. Инсон ҳар нарсадан воз кечиши мумкин, молидан, ҳатто жонидан ҳам. Лекин она ва оқ сўз билан қалбга муҳрланган тилдан воз кечиши мумкин эмас. Тилини унутганинг эса манқуртдан фарқи йўқдир.

Дунёда ўзининг тилига эга бўлмаган бир қанча миллат ва элатлар мавжудлигини ҳисобга оладиган бўлсак, шуқурки, ўзбекнинг ҳар боласи ўз туйғуларини, фикрларини она тилида қандай хоҳласа шундай ифодалай олади. Бунинг учун бошқа тилнинг ёрдами керак эмас.

Она тил – ўзбек тилимиз худди жафоқаш халқимиз каби не-не машаққатли кунларни, зуғумларни бошдан кечирган. Унинг софлигини сақлаш йўлида қанчадан-қанча маърифатпарвар адибларимиз мардонавор кураш олиб борган. Тарих силсиласидан соғ-омон ўтган тилимиз бугун ҳам ҳар биримизнинг ҳимоямизга, асраб-авайлашимизга муҳтож.

Тилимизга нисбатан дахлдорлик туйғуси билан яшашга уринар эканмиз, шу ўринда таъкидлаш ўринлики, она тилида фикрламайдиган ҳар қандай инсон миллатининг руҳини тушунмайди, аёнки, ундайларга миллатининг дарди ҳам бегона.

Муаттар МАҲМУДОВА.

Долзарб мавзуда

(Бошланиши 1-бетда)

– Ўтган йили узум жуда арзон эди, 15-20 минг сўмдан ошмаган, ҳатто 3-5 минг сўмдан сотган кунларимиз ҳам бўлганди, – дейди сотувчи Турсунали ота Эрматов. – Унинг қимматлиги кам етиштирилганида. Узум жуда харидоргир мева, аҳоли эҳтиёжи юқори, шунга қараб бозорга кўпроқ олиб келишга ҳаракат қиляпмиз.

– “Келин бармоқ”нинг 1 килограмми 30 минг сўмдан, – дейди сотувчи Малика Тошматова. – “Мерседес”нинг қизирили 55 минг сўмдан сотаяпмиз. Бу йил узумнинг ҳосили камлиги сабабли ўтган йилдагидан анчагина қиммат. Бозор талаби шу, қайси маҳсулот оз бўлса, нархи юқори бўлади.

– Эрта тонгда, иссиққина нонни узум билан тановул қилишни хуш кўраман, – дейди харидор Шарифа опа Абдуллаева. – Аксига олиб бу йилги узумларнинг қимматлигини қаранг. Лекин бизнинг юртимизда етиштирилаётган узумлар тилни ёради, сифати ҳам яхши.

Вилоятимизда узумнинг 10 дан зиёд навлари етиштирилади. “Каттакўрғон”, “хусайни”, “келин бармоқ”, “мерседес”, “тойфи” сингари узумлар саратондан то кўкламга қадар халқимиз дастурхонини безатади. Узумчилик борасида эса олтиариқлик миришкорларнинг олдида тушадигани йўқ, албатта. Улар йил бўйи нафақат вилоятимиз, балки бутун республикамизга, шунингдек, хориж мамлакатларига ҳам узум етказиб берадилар. Бироқ бу йил Олтиариқда ҳам узумнинг нархи анча баланд. Сабабларидан бири қиш фаслида ҳаво ҳароратининг кескин тушиб кетгани ток кўчатларининг совуқ уришига олиб келди. Натижада узум



кутилган ҳосилни бермади.

– 11 гектар майдонда узумнинг ўнга яқин турини етиштирамиз. Ўтган йилдагига қараганда бу йил ҳосил чўғи анча кам бўлди, – дейди Олтиариқ туманидаги “Nirt fruit” фермер хўжалиги раҳбари Нуриддин Алиқулов. – Узумни йиғиштириб, музлаткичли омборларга жойлаш билан бирга, килограммини 10 мингдан 30 минг сўмгача сотдик. Ток кўчатлари парваришида об-ҳаво катта ўрин тутди. Баъзида куз ойлари кутилганидан кўра иссиқ бўлади ёки совуқ эрта келиши мумкин. Узум сентябрь ойида, куз иссиқ келганда эса ноябрь ойида узилган ҳолатлар ҳам бўлган. Бу йил январь ойида кечган қаҳратон совуқ эса ток кўчатларига ўз таъсирини ўтказмай қўймади, албатта. Натижа-

да узум экспортига талаб ортиб, нархларнинг кескин ошишига олиб келди.

Узум вилоятимиз бўйлаб аҳоли томорқаларида ҳам парваришланади. Бироқ, ҳақиқатан ҳам, аёзли кунлар ҳовли жойлардаги узумтоқларида ўз асоратини қолдирди. Бор ҳосилни ҳам тадбиркорлар йиғиштириб олиб, қўшни вилоятларга ёки ёндош давлатларга экспорт қилмоқдалар.

Бу йил ҳам Олтиариқда узум яхши ҳосил берди, – дейди тумanning Повулгон қишлоғида яшовчи миришкор деҳқон Воҳид Болтабоев. – Фақат аномал совуқ туфайли Тожикистоннинг тоғли ҳудудларига яқин жойларда узумни совуқ уриб кетди. Олтиариқ узумларига совуқ таъсир қилмади. Бошқа вилоятларда узум яхши ҳосил бермагани

туфайли нарх анчагина ошган.

Мутахассисларнинг таъкидлашича, ўтган йилги аномал совуқ туфайли қўшни Тожикистон, Қирғизистон, Қозоғистондаги узумларнинг сара навлари нобуд бўлган.

– Қўшни давлат узумларини совуқ ургани учун Ўзбекистонда узум экспортига талаб ошиб кетди, – дейди Ўзбекистон Республикаси Қишлоқ хўжалиги вазирлиги Боғдорчилик ва узумчилик бўлими бошлиғи Акмал Мирзаев. – Экспортга талаб ошгани ҳисобига нархлар бироз қимматлашди. Асосан “ризамат”, “мерседес” каби экспортбоп узум навларини совуқ олиб кетган. “Тойфи”, “хусайни” навларига совуқ унчалик таъсир қилмаган.

Совуқ кўпроқ аҳоли томорқаларидаги тупроққа кўмил-

УЗУМНИНГ НАРХИ НЕГА ҚИММАТ?

маган узумзорларга зарар етказган. Совуқдан сақлаб қолинган узумзорларимизда яхши ҳосил олиш учун агротехник тадбирларни бажарганмиз. Лекин барибир бозорларимизда аҳоли хонадонларидан келтирилган узумлар камлиги сезил-япти.

Хорижга узум экспорт қилиш бўйича энг кўп тадбиркорлар Фарғона вилоятида экани сир эмас. Биргина Олтиариқ туманининг ўзида 51 та субъект хорижга мева-сабзавот сотиш билан шугулланади. Музлаткичли омборхоналар қуриш борасида ҳам туман анча олдинлаб кетган. Бугунги кунда бу ерда турли сиғимдаги 100 дан ортиқ музлаткичли омборхоналар мавжуд. Йиғиб-териб келтирилган турли хил мева ва бошқа маҳсулотлар бу жойларда меъёрдаги даражада совутиб, сақлаб турилади.

Инсон саломатлигида муҳим ўрин тутувчи, дармондориларга бой бўлган узумга ёзин-қишин эҳтиёж сезилади. Тўй-танталаримиз, маърака-маросимларимизда ҳам узум дастурхоннинг кўрки. Шундай экан, ҳар ғужуми тош босадиган узум ҳосилидан ва унинг нархидан аҳолининг кўнгли ҳам, эҳтиёжи ҳам қонмоғи зарур.

Маҳиёра БОЙБОБОВА.

Ҳуқуқий сабоқ

КАФИЛ ЭНДИ НИМА ҚИЛСИН?!

– Синфдош дугонам кредитга уй олаётганда кафил бўлишимни сўради, йўқ дея олмадим. У кредит тўловида муаммо бўлмаслигини айтганди. Орадан икки йил ўтгач, дугонам туғуруқ таътилига чиқди ва кредит тўловида муаммо пайдо бўлди. Уч ойдирки, банк тўловни менинг ҳисобимдан ечиб оляпти. Бу ҳолат оиламда турли тушунмовчиликларнинг келиб чиқишига сабаб бўлмоқда. Кафил бўлган шахснинг пластик карточкасида тўлов учун маблағ ечиб олиш қонунчиликка тўғри келадими?
Шоира Раҳматова, Фарғона шахри.

Бугун кредит сиёсати ривожланган жараёнда бундай масалалар кўпчилик кафилларнинг бошини қотирган. Айниқса, шу каби ҳолатлар опа-сингиллар, ака-укалар, яқин қариндошлар ўртасида рўй берганда кутилмаган нохуш вазиятларга ҳам олиб келаётганини кўриш мумкин. “Кафиллик шартномаси” деган тушунча қонунчиликда азалдан мавжуд бўлса-да, унинг асл моҳияти кейинги йилларда кенгроқ намоён бўла бошлади. Кафиллик шартномасига асосан кафил бошқа шахснинг кредитори олдида муайян даражада жавоб беришни ўз зиммасига олади демакдир.

Банкдан кредит олган шахс ка-

филлик билан таъминланган мажбуриятини тўлиқ ёки лозим даражада бажармаган тақдирда, кафил ва қарздор кредитор олдида солидар тартибда жавоб беради (башарти қонунда ёки кафиллик шартномасида кафилнинг субсидиар жавобгар бўлиши назарда тутилган бўлмаса). Бунда кафил кредитор олдида қарздор билан баравар ҳажмда жавоб бериб, фоизлар, қарзни ундириб олиш бўйича суд чиқимлари ва қарздор мажбуриятини бажармагани ёки лозим даражада бажармагани туфайли кредитор кўрган бошқа зарарларни тўлайди.

Кафил кредиторнинг талабига қарши қарздор билдириши мумкин



бўлган ҳамма эътирозларни қўйишга ҳақли. Ҳатто қарздор ўз эътирозларидан воз кечган ёки ўз мажбуриятини тан олган тақдирда ҳам кафил ушбу эътирозларга бўлган ҳуқуқини йўқотмайди.

Мажбуриятни бажарган кафилга кредиторнинг ушбу мажбурият бўйича ҳуқуқлари ҳамда гаровга олувчи сифатида кредиторга тегишли бўлган ҳуқуқлар кафил кредиторнинг талабини қанча ҳажмда қаноатлантирган


бўлса, шунча ҳажмда ўтади. Кафил кредиторга тўланган суммага фоизлар тўлаш ва қарздор учун жавобгарлик муносабати билан кўрган бошқа зарарини тўлашни қарздордан талаб қилишга ҳақли. Агар шартномада бошқача тартиб назарда тутилган бўлмаса, кафил қарздорга кўрсатган хизматлари учун ҳақ олиш ҳуқуқига эга.

Шартномада кўрсатилган кафиллик муддати ўтганидан кейин кафиллик бекор бўлади. Агар асосий мажбуриятни бажариш муддати кўрсатилмаган ва белгиланиши мумкин бўлмаган ёки талаб қилиб олиш пайти билан белгиланган бўлса, кредитор кафиллик шартномаси тузилган кундан бошлаб бир йил мобайнида кафилга нисбатан даъво қўзғатмаган тақдирда кафиллик бекор бўлади.

Шуни алоҳида таъкидлаш жоизки, банк-кредит муносабатларининг кенг ривожланиши натижасида кафиллик шартномаларига бўлган талаб ҳам ошиб бормоқда. Бу жараёнда баъзи жисмоний шахсларнинг қонун талабларини билмаслиги фирибгарлик жиноятининг содир этилиши ҳамда турли низоларга сабаб бўлмоқда. Шу боис, кафил бўлишда қонунчиликда белгиланган тартиб-қоидаларни синчиклаб ўрганиш ва уларга қатъий равишда риоя этиш зарур.

Д.АКРАМОВА, Фарғона вилоят судининг иқтисодий ишлар бўйича судлов хайъати судьяси.

“Бир белбоғ – бир йўлни қуриш, инсониятнинг ягона тақдири ҳамжамиятини барпо этиш: Ўзбекистондан назар” танловига



МЎЪЖИЗАЛАР ОСМОНДАН ТУШМАЙДИ

Ёхуд Хитой тараққиётининг сирлари ҳақида

(Бошланиши 1-бетда).

Эрамиздан олдинок, гарчи худудлар ўртасида турли низолар кечаётган бўлса-да, ушбу заминда ипакнинг ихтиро қилиниши Буюк ипак йўлига асос солганди. Буюк Хитой деворининг қурилиши эса ўша давр архитектура-сидагина янгилик бўлиб қолмади. Бу иншоот халқ заковатининг, ҳамкорлиги ва меҳнаткашлигининг чинакам тимсолига айланди. Зеро, тасаввурингиз аниқ бўлиши учун айтиш мумкинки, бизда Катта Фарғона канали ва Каттақўрғон сув омбори қурилишида ҳам худди шундай жараён кечган.

Бронза давридаёқ хитойликлар ероти маъданларини қазиб олишни ўзлаштиришган. Тибет табобати асрлар давомида шаклланган. Бир суҳбатимизда Ўзбекистон Қаҳрамони, Ўзбекистон халқ шоири Абдулла Орипов “Ука, Хитой табобатининг қудрати шундаки, у одамни касал бўлишга қўймайди” деганида минг карра ҳақ эди.

Тараққиётда, ҳатто мўъжизаларда ҳам тасодифлар бўлмайди. Халқнинг иродаси, заковати ҳам йиллар давомида шаклланиди ва биз бу ўлкада ана шу цивилизациянинг натижасини кўриб турибмиз. Пайғамбаримиз Муҳаммад соллаллоху алайҳи васаллам “Илми Чинда бўлса ҳам ўрганилганлар”, деб бежиз айтмаган. Бу ҳақда кўплаб ҳадисшунослар ривоят қилганлар.

Камина ҳар гал борганимда, аввало, хитойликларнинг ҳаракат ҳамда муносабатларини синчиқлаб кузатаман, бу элнинг ютуқлари сирини ўзларидан сўраб билишга ҳаракат қиламан. Биринчи англаганим, уларнинг қонунга итоаткорлиги бўлди. Мумкин бўлмаган ишни қилишмайди, ҳеч ким кўрмди-ку, деб фикрламайди, йўлнинг ҳам тақиқланган қисмидан ўтмайди. Айниқса, мактаб ва бошқа ўқув юртларида кириш учун қўнғирок чалинган, коридорда ҳеч кимни кўрмаймиз.

Кутубхоналаридаги жимлик ва имо-ишораларга ҳавасим келди. Бунинг устига ҳар бирида камида иккитадан замонавий телефон бўлишига қарамасдан сал имкон топса, йўлда ҳам, ўтирганда ҳам газета ёки журнал варақлайди.

Жанубий Хитой вилоятида бир медиа ташкилоти 20 та босма нашрга – газета ва журналларга эга экан. Социалистик тузумда капиталистик ишлаб чиқариш муносабатларини жорий этган ва бу борада қойилмақом натижага эришган давлат учун бу ҳам оддий ҳол экан.

Кийинилари оддий, танасига

қулай, дидига муносиб либос кийишади, куз, қиш ва баҳорда иссиқ кийимда юришади. Меҳмонларнинг бирорта саволи жавобсиз қолмайди, дўконларга, меҳмонхонага кирганингизда доимо хушмуомала бўлишади.

Бир гал меҳмонхона эшиги ташқарисида аскардай турган йигитга салом бердим, у бир қаради-ю, индамади. Ўзимча аҳолини сўрадим, яна индамади. Гид бу ҳолатни тушунтирди: бу йигит фақат юк билан келадиган меҳмонларга хизмат кўрсатар, бошқалар билан муомалага киришса, ишдан ҳайдалар экан.

Мактабда кимё фани ўқитувчиси билан суҳбатлашдим, 27 ёшда экан, университетни битирган, беш йилдан бери дарс бераркан.

– Оилалимисиз? – сўрадим ундан.

– Ҳа, хотиним троллейбус ҳайдайди.

– Фарзандларингиз борми?

– Биз ҳали бола парваришига тайёр эмасмиз.

– Уйингиз бордир?

Маълум бўлишича, эр-хотин ижарада туришаркан, у хусусий уй ортиқча ташвиш ва ҳаражат эканини айтди. Бунинг кундалик жадвалидан ҳам билса бўларкан. Эрталаб соат 6:30дан 7:30гача хотини билан спорт боғида жисмоний тарбия билан шуғулланади. Ювиниш ва эрталабки нонуштага 40 дақиқа кетади. Соат 8:30да ишда бўлишади. Ишдан кейин бир соат сайрга ажратилган. Кейин бир соат кунора кутубхонада ёки спорт залида бўлишади. Кечқурун биргаликда кино, театр ёки концертга, ҳафтада бир маротаба ресторанга боришади. Уйга асосан ухлаш, дам олиш учун келишади.

Умуман, Хитойда кўплаб зиёли ва давлат хизматчиларида уй йўқ экан. Имтиёзли уй бериш ҳам йўлга қўйилмаган, кўп қатори кредитга уй олиш мумкин. Агар оламан, деса, уй топилади.

Мени хитойликларнинг ўз соғликларига муносабати қизиқтирди. Эрталаб улар сафида спорт боғларида бордим.

Боғ деганимиз дарахт билан қопланган яшиллик орасида ўрнатилган тренажёрлардир. Бир гектарлик бундай жойлар жуда кўп, атрофида биздагига ўхшаб шашлик ёки сомса пиширилмайди, музқаймоқ сотилмайди. Бу ерда эрталабдан соат саккизларга қадар ҳаммани кўрасиз: ёшу қари, эркагу аёл, ҳатто ҳижобдагилар ҳам бир чеккада шуғулланишади. Шу сабабли Пекиндай катта ва аҳолиси кўп пойтахтда ҳам дорихона жуда кам. Бори ҳам табиий дориворлар сотади.

Поликлиника мавқеидаги шифохоналарда барча турдаги ва тоифадаги врачлар бор. Улар беморни кўриш жараёнида биргаликда ёки онлайн орқали маслаҳатлашадилар. Рецептда шифокорнинг имзоси бўлмаса, дорихона дори бермайди. Дарвоқе, кучлироқ дорилар учун янгилик яратилмоқда. Хусусан, мамлакатимиз билан ўзаро ҳамкорлик ривожланган сари биз бу муваффақият сирларини равшанроқ билиб бораёмиз.

Хитой бугун дунёга чинакам мўъжиза кўрсатмоқда. Ҳаётнинг кўплаб соҳаларида деярли ҳар куни бу ерда бир ихтиро, янгилик яратилмоқда. Хусусан, мамлакатимиз билан ўзаро ҳамкорлик ривожланган сари биз бу муваффақият сирларини равшанроқ билиб бораёмиз.

Бугун юртимиздаги кўплаб худудлар Хитой провинциялари ва шаҳарлари билан яқин ҳамкорлик қилмоқда.

Хусусан, Самарқанд вилояти Чин ўлкасининг Шэнси, Шандун, Цзянсу провинциялари билан биродарлашган ҳолда, тадбиркорликни ривожлантириш, аҳолини камбағалликдан чиқаришда мазкур худудлар тажрибасини ўзимизда жорий этмоқда. Мисол учун, Нарпай ва Пахтачи туманларида Шандун провинцияси, Қўшрабат ва Пайариқ туманларида эса Шэнси провинцияси тажрибасини қўллаган ҳолда, аҳолини камбағалликдан чиқариш ва тадбиркорликка ўргатиш йўлга қўйилмоқда. Цзянсу провинцияси тадбиркорларига эса Каттақўрғон туманида фаолият олиб боришлари учун зарур шарт-шароит яратиб берилмоқда.

Ушбу провинциялар раҳбарияти ва тадбиркорлари шу йилнинг сентябрь ойида Самарқандда бўлиб, ўз тақдимотларини ўтказди. Ҳокимлар, ишбилармонлар билан манфаатли келишувларга эришди. Орадан кўп ўтмай, Самарқанд вилояти делегацияси ҳам Хитойга бориб, мазкур провинцияларда ўз тақдимотларини ўтказди. Кўплаб истиқболли келишувлар имзоланди, йирик инвестициявий лойиҳаларни биргаликда амалга оширишга қарор қилинди.

Шунингдек, **туризм, қишлоқ хўжалик маҳсулотлари етиштириш ва уларни қайта ишлаш, металлургия, машинасозлик, кимё sanoати йўналишларида ҳамкорлик кўлами кенгайиб бормоқда. Бугунги кунда Самарқанд вилоятида Хитой тадбиркорлари иштирокидаги 75 та корхона мавжуд бўлиб, улардан 18 таси тўлиқ Хитой сармоясига иштирокида ташкил этилган.**

Фармон ТОШЕВ,
Ўзбекистонда хизмат кўрсатган журналист,
Олий Мажлис Сенати аъзоси



Корхоналарнинг 54 таси sanoat маҳсулотлари ишлаб чиқариш йўналишида, 5 таси қурилиш, автотомбилсозлик, савдо ва хизмат кўрсатиш соҳаларида фаолият юритиб келмоқда. Жумладан, Самарқанд шаҳридаги “Азия металл проф” МЧЖ шаклидаги металлургия корхонасида 800 дан ортиқ иш ўринлари яратилган. Бугунгача хитойлик ҳамкорлар томонидан 33,0 миллион АҚШ долларилик тўғридан-тўғри инвестиция киритилган. Корхона ўрамали металлдан қувурлар ва профиллар, рухланган ва полимерланган тунукалар ишлаб чиқаради.

Бугун Самарқандда Хитой компаниялари томонидан ишлаб чиқарилаётган автомобиллар савдоси билан шуғулланаётган дилерлар кун сайин кўпайиб бормоқда. Бу бежиз эмас, албатта. Ушбу автомобиллар сифати, қулайлиги, камхаржлиги, хавфсизлиги тизими ва бошқа сифатлари билан харидорлар ишончини қозонди. Мухими, уларга техник хизмат кўрсатиш ҳам кафолатланмоқда.

Ёки Самарқанд шаҳрида аҳолига сифатли жамоат хизмати кўрсатишда ҳам Хитойнинг Ютонг компанияси автобус ва электробусларидан фойдаланилаётганини олинг. Бу ҳам аҳолига қулайлик, қолаверса, транспорт хизмати кўрсатувчи корхона манфаатига тўла мос келгани учун танланганини унутмаслик лозим.

Яқинда Самарқанд вилоятининг Каттақўрғон туманида хитойлик инвесторлар кўмагида йилига 3 миллион тонна цемент ишлаб чиқариш қувватига эга “Henguan cement” хорижий корхонаси фаолият бошлади.

38,5 гектар майдонда бунёд этилган корхонага Хитойдан замонавий ускуналар келтирилди. Заводнинг йиллик экспорт қуввати 82 миллион АҚШ доллари ташкил қилиб, Европа давлатлари ва бошқа мамлакатларга йўналтирилади. Келгусида мазкур корхона Марказий Осиёдаги энг йирик цемент ишлаб чиқарувчи заводга айланиши кутилмоқда.

Англаганим шу бўлдики, Хитой тараққиётининг энг катта манбаси, бу – халқнинг онгу тафаккури ва қонунга итоаткорлиги, меҳнатсеварлиги. Негаки, бу ўлкада ишламайдиган одам тишламайди, ҳар бир фуқаро агар меҳнат қилмаса, ҳароб бўлишини билади. Давлат ана шундай тартиб ва қоида билан маҳкам ушлаган.

Яқинда бориб келган ишбилармон танишим яна бир гап айтди. Хитойда жинойтчи, ландувор, ишқамасларнинг ўзларидан кўра фарзандлари билан жиддий шуғулланишар экан. Токи, шу оиладан яна бита ношуд етишиб чиқмасин деб, у болалар махсус мактабларда ўқитиларкан, касб ўрганишига

имкон яратиларкан.

Мен сезган яна бир ибратли ҳолат, бу – мамлакат халқининг ўз тарихига, ватанига садоқатидир. Хитойга қилган ижодий сафаримиз чоғида таниқли журналист, устоз Сафар Остонов “Ука, кўрдингизми, хитойликлар ўзларидаги музей ва тарихий обидаларни ҳавас билан томоша қилишаркан, бола-чақасини ҳам олиб келишаркан. Мана шу даражага биз ҳам эришимиз лозим”, деган эди.

Шу ўринда айтишим керакки, мамлакатдаги барча йирик ташкилот ва корхоналарнинг ўз музейлари бор. Улар нафақат таништирувчи, балки тарғиботчи вазифасини ҳам бажаришади. Бунинг хатто “Xinhua” ахборот агентлиги, “Хуай бай” компаниясида ҳам кўрдик.

Фақат бугина эмас, Хитой нафақат дунёни лол қолдирипти, балки дунёдаги энг илғор интеллектуал кучдан унумли фойдаланяпти. Бунинг

Ўзбекистонда хизмат кўрсатган журналист, хитойшунос ҳамкасбим Муҳаммаджон Обидов ўзининг “Буюк ипак йўлидаги Шинжон” китобида жуда асосли ёритиб берган. Унда ёзилишича, Хитойнинг муваффақияти, аввало, мавжуд ижтимоий, иқтисодий ва ҳуқуқий тизимлар ҳамда чет эллик интеллектуал мулк эгалари ва сармоядорлар учун имкониятни яхшилашда кўзга ташланмоқда. Бинобарин, Тан сулоласи бошқаруви даврида ҳам давлатни ривожлантиришга кўплаб илтидорли хорижликлар жалб этилган.

Бу анъана ҳозирги кунда ҳам давом этмоқда. “China daily”нинг ахборотида кўра, 2006-2016 йиллар давомида Хитой ҳар йили 300 минг нафар чет эллик мутахассисларни қабул қилган. Улар мамлакат ривожига муносиб ҳисса қўшиб, ҳурмат қозонган. Ўз навбатида, давлат ҳам бундай заковат эгаларига “Дўстлик” ордени таъсис этган. Хорижлик талабаларнинг Хитойда таълим ва олимлик даражасини олиши учун шароит яратилган.

Мамлакат таълим вазирлигининг маълумотида кўра, 2016 йилда Хитойда таълим олаётган ёшлар 390 минг нафарни ташкил этган. Уларга Хитой ҳукумати стипендияси ҳам берилаётди. 2011 йилдан бери эса “Хорижий экспертларни жалб қилиш” дастури ишланмоқда.

Фикримнинг исботи учун бир мисол келтирмоқчиман. Биз “Хуай бай” компаниясига борганимизда унинг учта бошқарувчиси борлигини билдик. Бири – араб, бири – инглиз, яна бири хитой миллатига мансуб. Улар ярим йил муддатда навбати билан раҳбарлик қилишади. Компания мутахассислари орасида ҳам хорижлик мутахассислар анчагина экан.

Жараён:

БУНЁДКОРЛИК – ИНСОН ОМИЛИ БИЛАН БОҒЛИҚ

Фарғона тумани маркази – Водилга кириб борар экансиз, олисларда баланд тоғлар виқори инсонни ҳайратга солади. Бу ердаги ўзгаришлар, қурилиш ва бунёдкорлик ишларидан кўз қувнайди. Умуман, бугунги кунда туман чин маънода катта ўзгаришларга юз тутмоқда. Қай маҳаллада бўлманг, аҳоли юз-кўзида кўтаринки кайфият ва шукроналикни туясиз.



Жорий йилда туманда ижтимоий ва ишлаб чиқариш инфратузилмасини яхшилаш доирасида давлат бюджети-дан ажратилган 178 миллиард 426 миллион сўм маблағ эвазига қурилиш ва таъмирлаш ишлари якунига етай деб қолди. Амалий ишлар натижасида тумандаги 64 та маҳалла фуқаролар йиғинларида электр таъминотини яхшилаш мақсадида 35 км узунликда электр тармоғи тортилди, 30 та трансформатор ва 1478 та темир-бетон таянчлар ўрнатилди. Хусусан, "Барқарор ҳамжихатлик" ва "Меҳнатобод" маҳалла фуқаролар йиғинлари ҳудудида 6,6 км узунликдаги электр узатиш тармоғи тортилди, 192 та темир-бетон таянчлар ва қўшимча 6 та трансформатор ўрнатилди. Ўзбекистон Республикаси Президентининг 2022 йил 25 октябрдаги "2022-2023 йилларда маҳаллалар инфратузилмасини янада яхшилаш бўйича қўшимча чора-тадбирлар тўғрисида"ги қарори ижросини таъминлаш мақсадида 8 та маҳалла фуқаролар йиғинларида электр

таъминотини яхшилаш мақсадида тузилган дастурига асосан, 14,2 км масофага электр узатиш тармоғи тортилди, 5 та трансформатор пункти, 323 та таянчлар ўрнатилди. Сўнгги пайтлардаги бунёдкорлик ишлари натижасида қишлоқлардаги ички йўллар ҳам тартибга келтирилмоқда. 70 км ички йўлларни асфальтлаш, бетонлаш ишлари якунига етказилди ва 20 миллиард 265 миллион сўмлик жорий таъмирлаш ишлари амалга оширилди. "Бирдамлик" маҳалла фуқаролар йиғини ҳудудида қиймати 191 миллион 414 минг сўм бўлган кўприк қурилиб, фойдаланишга топширилди. Бу билан аҳолига бирмунча қулайлик яратилди, автомобиллар тирбандлигининг олди олинди. Тоza ичимлик суви катта-ю кичикка бирдай зарур неъмат. Туман бўйича 94 км ичимлик суви тармоқлари тортилган бўлса, 20 та тик қудуқ қазиш ишлари бажарилди. 5,7 км оқава сув тармоқлари тортилди,

15 та сув минораси ва 16 та трансформатор ўрнатилди. Натижада 5886 та хонадон тоза ичимлик суви билан таъминланди.

Аҳолини уй-жой билан таъминлаш масаласи доимий эътиборда. Ўтган йилда 8 та кўп қаватли турар жой қурилиб, талабгор фуқароларга топширилган

яқин аҳоли истиқомат қиладиган ҳудудда ва ижтимоий объектларда электр энергияси, табиий газ, оқава ва тоза ичимлик суви, марказлашган иссиқлик тизими каби коммунал хизматлар билан боғлиқ масалалар ижобий ҳал этилди.



Мавзеда

990 ўринли мактаб, 2 та ҳар бири 120 ўринли мактабгача таълим ташкилотлари бинолари қурилиши якунланди. Маҳалла фуқаролар йиғини идораси, маданият уйи, савдо шохобчалари, тиббиёт масканлари, спорт комплекси, сайилгоҳ каби ижтимоий объектларда бунёдкорлик давом этапти.

Ҳудудда иссиқлик тизими бўйича лойиҳа қиймати 8 547,1 миллион сўм бўлган 1 та қозонхона ва 6,1 км иссиқлик тармоғини тортиш белгиланган бўлиб, бош пудратчи "Discover invest" масъулияти чекланган жамияти томонидан мазкур қозонхона биноси қурилди, 1 та 1500 кВт, 2 та 1750 кВт.ли қозон ўрнатилди, ҳозирда электр жиҳозларини монтаж қилиш ишлари олиб борилмоқда. Шунингдек, 94 км ичимлик суви ва 24,2 км оқа-

ва сув тармоғи тортилди, 2,8 млрд. сўм эвазига ҳудудда 5,5 км электр тармоғи ва 8 та трансформатор ўрнатиш назарда тутилган.

Бундан ташқари, "Яшил макон" дастури доирасида 714 туп манзарали дарахт кўчатлари ўтқазилган 4 гектарлик "Янги Ўзбекистон" боғи ҳам келажакда ҳудуд аҳолиси ва меҳмонлари учун маданий ҳордиқ масканига айланади.

Жорий йилда ўтказилган "Ташаббусли бюджет" жараёнининг 1-босқичида фуқаролардан келиб тушган 14 та таклиф учун 15,9 млрд. сўм маблағ ажратилди. Хусусан, 14-умумтаълим мактабини жорий таъмирлаш ишлари тўлақонли бажарилган бўлса, "Дўстлик" маҳалла фуқаролар йиғини ҳудудида жойлашган 33-мактабгача таълим ташкилотига энгил типдаги 90 ўринли қўшимча бино қуриш ишлари якунланишга арафасида.

Шунингдек, 2-касб-хунар мактабида бунёд этилаётган автомобилсозлик, электро-монтер ва пайвандловчи касбларини ўргатиш учун металл конструкцияли ўқув устaxonа ҳам яқин кунларда фойдаланишга топширилди.

Лойиҳалар доирасида "Юқори Водил" маҳалла фуқаролар йиғини ҳудудидаги аҳоли хонадонларига 6,3 км ичимлик сув тармоғи тортилди, 1 та сув минораси ўрнатилиб, сув қудуғи қазиш ишлари бажарилди.

Дарҳақиқат, республикамизнинг барча ҳудудлари бўйлаб кенг қулоч ёзган бунёдкорлик ишлари Фарғона тумани маҳаллаларида ҳам ўз аксини топмоқда. Зотан, халқимиз, қишлоқ жойларда яшовчи аҳолининг муносиби турмуш кечиришини таъминлаш йўлидаги ислохотлардан кўзланган пировард мақсад, энг аввало, инсон омили билан чамбарчас боғлиқ. Шу жиҳатдан, эзгу ишларнинг барчаси аҳоли манзилларининг янада обод ва кўркем қиёфа касб этиши йўлидаги улкан амалий қадамдир.

Муродхон КОДИРХОНОВ, туман ҳокимининг саноатни ривожлантириш, капитал қурилиш, коммуникациялар ва коммунал хўжалик масалалари бўйича ўринбосари.



2023 йил — Инсонга эътибор ва сифатли таълим йили

ЯНГИЛАНАЁТГАН ШОМИРЗАДА

Бугун хонадонлар, кўчалар, бутун маҳалла бўйлаб кенг кўламдаги ободонлаштириш, бунёдкорлик ишлари амалга оширилиб, кўмакка муҳтожлар ижтимоий қўллаб-қувватланмоқда

Нима учун айнан Шомирзада? Очiq айтиш керак, беш мингдан ортиқ аҳоли яшайдиган маҳалла аҳли ўзоқ йиллардан буйн муаммолар гирдобидида қолганди. Аҳоли учун ичимлик суви келтириш, электр узаткичларни янгилаш, кўчаларни асфальтлаш, мактаб, мактабгача таълим ташкилотларини таъмирлаш, энг асосийси – аҳолининг томорқаларидан унумли фойдаланиши учун сув таъминотини йўлга қўйиш, хуллас, муаммоларнинг кўлами кенг ва уларни бартараф этиш жуда катта маблағ, ҳаракат ва сафарбарликни талаб этарди.

Мурожаатлар асосида вазиятни чуқур таҳлил этган Президент Администрацияси ҳудудда "Обод хонадон", "Обод кўча", "Обод маҳалла" мезонлари асосида бунёдкорлик ишларини амалга ошириш ва молиялаштириш манбаларини белгилаш юзасидан маҳаллада хатлов ўтказиш, аниқланган муаммоларни бартараф этиш, аҳоли турмуш даражасини кўтариш, уларнинг ҳаётдан рози бўлиб яшашлари учун тегишли чора-тадбирларни белгилаш вазифасини дахлдор идораларга топширганди. Тез ўтмай амалий ишлар авж олди.

Вилоят ҳоқими секторига қарашли туманнинг "Шомирза" маҳалла фуқаролар йиғинида олиб борилаётган ишларни кузатиб, ҳудуд чиндан ҳам бунёдкорлик майдонига айланганлигига гувоҳ бўлдик.

– Бугун кўрсатилаётган эътибордан шомирзаликларнинг кўнгиллари тоғдек юксалган, – дейди маҳалла фуқаролар йиғини раиси Раҳматилло Отақулов. – Дастлаб 904 та хонадон, мавжуд 12 та кўча, ташкилот ва муассасаларда ўтказилган хатловга биноан "Обод хонадон", "Обод кўча", "Обод маҳалла" мезонларини жорий этиш бўйича амалга ошираладиган бунёдкорлик ишларининг чора-тадбирлар дастури ишлаб чиқилди. Чуқур таҳлиллардан сўнг муаммолар, уларни бартараф этиш, сарфланадиган маблағлар, молиялаштириш манбаси, ижро муддати, масъуллар аниқ-тиниқ белгилаб олинди.

Шундай қилиб, ҳудудда республика

оила – тадбиркор" дастури доирасида 2 миллиард 432 миллион, жами 26 миллиард 728 миллион 700 минг сўмлик ҳажмда қурилиш, таъмирлаш, ободонлаштириш ишлари амалга оширилиши режалаштирилди. Шунингдек, аҳолининг эҳтиёжманд қатламига деҳқончилик қилиш учун ер майдони, асбоб-ускуналар учун субсидиялар ажратиш, бандлигини



таъминлаш, моддий ёрдам бериш учун тегишли маблағлар молиялаштирилди.

Ўтган қисқа даврда "Обод хонадон" мезони асосида муаммоси аниқланган

– Ўзим ҳам қурувчи эдим, – дейди Матонат кўчасида истиқомат қиладиган Маъруфжон Ғаниев. – Иш устида жароҳат олганман, юрагимга жарроҳлик йўли билан стэнд қўйилган, оғир ишларга ярамай қолдим. Шунинг учун ҳам "Темир дафтар"га киритилганман. Қурилишини бошлаб, охирига етказа олмай қолган уйим шу кунларда туман газлаштириш идораси ҳамда туғишган акам қиладиган ёрдам билан битказил-япти. Яқин кунларда кўчиб ўтамиз. Турмуш ўртоғим иккимиз хонадонни обод қилиб ўтирсак, фарзандларимизни вақти-соати билан уйлаб-жойласак, деймиз. Кўрсатилаётган кўмакдан кўнглимиз кўтариляпти.

– Бошимизга тушган оғир фожиадан эсанкираб қолдик, – дейди Чинобод кўчасида истиқомат қиладиган Зироатхон Мадраҳимова. – "Тез тиббий ёрдам"да ишлайдиган турмуш ўртоғим автохалокат туфайли вафот этдилар. Уч фарзандим билан қолдик. Яхшиям бошимизда ҳукуватимиз бор. Мени шифохонага фаррош қилиб ишга жойладилар. Ўзим чевар эдим. Шу кунларда мана бу замонавий ва қулай тикув машинасини келтириб беришди. Ишдан қайтганимдан сўнг касаначилик қилиб, махси тикяпман. Шу машина билан ишим ўн бараварга енгиллашди ва унуми ортди. Даромадим ҳам шунга яраша бўляпти. Шу кунларда "Халқ банки" туман бўлими кўрсатаётган беминнат ёрдам туфайли хонадонимизга ошхона, ювиниш хонаси, тандирхона қуриб бериляпти. Ўзимиз ҳам имконимиз борида ҳаракат

қилиямиз. Ахир яшаётган хонадонимиз обод бўлса, кўнглимиз ҳам равшан, турмуш ўртоғим раҳматлининг руҳлари ҳам шод бўлади-да.

Маҳаллада бўлган одам ҳар бир хонадонда, кўчада ободонлаштириш, қурилиш-таъмирлаш ишлари олиб борилаётганининг гувоҳи бўлади. 725 та хонадон аҳли томорқадан унумли фойдаланиши учун иккита оқин сув қудуғи қуришга киришилганидан бениҳоят миннатдор. Аҳоли, айниқса, тоза ичимлик суви келтириладиганидан хурсанд. Ҳозиргача 3,6 километр ҳажмда қазилган ишлари амалга оширилган бўлса, 3,4 километрда қурувлар пайвандлаб бўлинди.

Маҳаллада 308 та темир-бетон таянчлар ўрнатиш режалаштирилган бўлса, уларнинг асосий қисми жойига қўйилди, тўққиз километр масофага электр тармоғини тортиш ишлари давом этаётир. Ҳудуддаги 10 та трансформатор пунктлари таъмирдан чиқарилди. Ички йўллари асфальтлаштириш, шағаллаштириш ишлари ҳам жадал олиб бориляпти. Йўлларнинг тўрт километрга асфальт ётқизилди ва бу ҳаракатлар тўхтагани йўқ. Режалаштирилганидан анча кўп – 4,3 километр масофадаги йўл шағаллаштирилди.

Маҳалла дарвозасини қуриш, фуқаролар йиғини биносини таъмирлаш, олд қисмини замонавий қиёфага келтириш, қуёш панели ўрнатиш, Чинобод кўчасида болалар майдончасини қуриш ишлари тегишли мутасаддилар назорати остида бир маромда бормоқда.

Бегиланган чора-тадбирлар режасида маҳалладаги ижтимоий объектларда ҳам бунёдкорлик ишларини бажариш кўзда тутилган. Хусусан, 30 ва 39-мактабгача таълим ташкилотлари биноларини таъмирлаш, 23-умумтаълим мактаби ўқувчилари учун спорт зали қуриш, чим устида хоккей турига қизиқувчи ёшлар учун спорт мактаби барпо этиш каби ишлар режалаштирилиб, молиялаштириш манбалари, муддатлари белгилаб қўйилган.

Хулоса, хонадон, кўча, маҳалла миқёсидаги ободлик, аҳолини рози қилиш орқали уларнинг ижтимоий фаоллигини кўтариш, ёшларнинг маҳалласи, юртига садоқатини кучайтириш ҳаракати бу ерда фаолият кўрсатаётган штабнинг кунлик таҳлили остида қизғин давом этмоқда.

**Хадичахон КАРИМОВА,
Қўштепа тумани.**



бюджетидан Инвестиция дастури доирасида 18 миллиард 570 миллион, республика ва вилоят маҳаллий бюджетининг қўшимча манбаси ҳисобидан 5 миллиард 390 миллион, "Аёллар дафтари", "Ёшлар дафтари", "Саховат ва кўмак" ва жамоатчилик жамғармалари ҳисобидан 336 миллион 700 минг, шунингдек, тармоқ корхонасининг маблағлари, "Ҳар бир

817 хонадоннинг 743 тасида қайтадан қуриш, ички, ташқи, том қисмини таъмирлаш ишлари амалга оширилди. Айниқса, эҳтиёжманд оилалар истиқомат қиладиган 29 та кўрғонни мукамал таъмирлаш ва реконструкция қилишда туман ташкилотлари кўрсатаётган беминнат ёрдамдан ҳаммининг кўнгли кўтарилмоқда.

Сиёсатшунос нигоҳи

(Бошланиши 1-бетда).

Бундан 76 йил олдин бошланган можаро ортидан ҳозирги даврга қадар Яқин Шарқда тинчлик йўқ. Бир вақтлар эмин-эркин яшаган Фаластин аҳолисининг ерлари бугун деярли тўлиқ эгалланган. Исроил 1967 йилги чегараларга қайтишни, Фаластин давлатига имкон беришни истамаяпти. Натижада, Яқин Шарқда, қолаверса, коллектив ғарб ва мусулмон дунёси ўртасида ўзаро муносабатларга катта зарар етмоқда.

Фаластин – Исроил можароси 76 йиллик тарихга эга. Исроил – ёш давлат, у 1947 йилда ташкил топган. Унга қадар, тахминан икки минг йил атрофида, мавжуд бўлмаган. Яҳудийларнинг қадимги давлатлари йўқ бўлиб кетишига яҳудийларнинг ички низолари ва ўша даврда янги дин ҳисобланган христианлик асосий сабаблар бўлган.

1945 йилда Гитлер Германияси йиқитилгач, дунё ҳамжамиятида яҳудийларга нисбатан глобал ачиниш ҳисси жуда кучли бўлади. 1945 йилда янги ташкил қилинган Бирлашган Миллатлар Ташкилоти, ўзининг энг биринчи катта иши сифатида, яҳудийлар учун Исроил давлатини ташкил қилишга киришади. БМТ қарорларига кўра, ўша даврдаги Фаластин ерларини иккига бўлиб, ерларнинг тахминан 55 фоизини яҳудийларга бериш, қолган 45 фоизини фаластинликларга қолдиришга келишилган.

Лекин, Исроил давлати ўша берилган ерлар билан чекланиш нияти йўқлигини кўрсатади. Мақсад – Фаластин давлати ерларини тўлиқ ўзлаштириш, Фаластин деган давлатни йўқ қилиш эди. Бу лойиҳага араб ва мусулмон давлатлари қарши чиқишади. Лекин Исроилнинг орқасида турган коллектив ғарб, аввало АҚШ, Англия ва Франция имкониятлари устун-



лик қилади.

1970 йилларга қадар, Фаластин давлати ва унинг манфаатлари учун асосан араб давлатлари курашади. Сезиларли натижа бўлмагач, араб жамиятлари ва халқлари жуда тушкун аҳволга келади. Ташаббусни, "араб кўчаси" – оддий одамлар, уларнинг уюшма ва ташкилотлари қўлга ола бошлайди. Айнан 1970 йиллар охирига келиб, ёмғирдан кейинги кўзқорин каби жангари гуруҳлар тузила бошлайди. Бу гуруҳлар, ҳар хил методлар орқали, жумладан, жангари усуллар билан ҳам Исроилга қарши курашади, Фаластин ерларини озод этишга ҳаракат қилади.

1982 йилда Ливанда шиаларнинг "Ҳизбуллоҳ" гуруҳи тузилади. 1987 йилга келиб эса ҲАМАС тузилади. ҲАМАС – сўзи аббревиатура бўлиб, "Исломи қаршилик ҳаракати"нинг қисқартмаси ҳисобланади.

Бошқа жангари гуруҳлар қатори ҲАМАСнинг ҳам икки қаноти мавжуд. Сиёсий қанот ташкилотнинг молиявий ишлари,

ташқи алоқалар, мафкура каби масалалари билан шуғулланади. Ҳарбий қанот эса, Исроилга қарши ҳарбий операциялар ўтказиш, ҳарбий тайёргарлик каби ишлар билан банд бўлади.

ҲАМАС борасида дунё давлатлари учга бўлинади. Исроилдан ташқари, АҚШ, Европа Иттифоқи, Канада, Япония каби давлатлар "террористик ташкилот" деб эътироф этади. Эрон, Қатар, Туркия, Россия Федерацияси, Хитой Халқ Республикаси, Ислон ҳамкорлик ташкилоти, Швейцария ва бошқа кўплаб давлатлар ҲАМАСни "террористик" деб тан олмайди. Араб ва мусулмон давлатларининг мутлақ кўпчилиги, ҲАМАСни "Исроилнинг ноқонуний ҳаракатлари қарши, Фаластин манфаатлари учун курашаётган ташкилот" сифатида эътироф этади. Учунчи давлатлар ҳам борки, улар ҲАМАСнинг фақат ҳарбий қанотини "террорчи" деб билади, мисол учун, Бирлашган Қироллик.

Саудия Арабистони ҲАМАСни "террорчи" деб айтмайди,

лекин алоқалари ҳам яхши эмас. Чунки ҲАМАС Эрон ва Қатарнинг лойиҳаси сифатида кўрилади, бу эса Саудияга ёқмайди. Саудия 2014 йилда Мусулмон биродарлари ташкилотини "террорчи" ташкилотлар рўйхатига киритган эди, ўшанда баъзи саудиялик сиёсатчилар, билвосита "ҲАМАС – Мусулмон биродарлари ташкилотининг филиали" деган маънода, салбий муносабат билдиришади.

ҲАМАСнинг ҳарбий қанотидаги жангарилар сони, баъзи маълумотларга кўра, 10-12 минг киши экани айтилади.

ҲАМАСнинг Исроилга 7 октябр кунини бошланган ҳужуми минтақадаги геосиёсий вазиятни таранглаштирди. ҲАМАСнинг ҳужуми Исроилнинг мақталган мудофаа тизимига катта завоқларни уйғотди, Исроил разведкаси ҳам одамлар тасаввур қилган даражада мукаммал эмаслиги маълум бўлди.

ҲАМАСнинг бу операцияси қуйидаги геосиёсий вазифаларни кўзлаши мумкин:

- Исроил ва Саудия диалоги, уларнинг ўзаро дипломатик алоқалар ўрнатиши ҲАМАС, унга тарафдор бўлган давлатлар, аввало, Эроннинг манфаатига тўғри келмайди.

- Гарчи Исроил билан барча араб давлатларининг алоқалари нормал бўлганда ҳам, Фаластин давлати тузилмас экан, бу Исроилга ёрдам бермайди – тинчлик ва барқарорликка эришилмайди.

- Исроил тинчлик ва барқарорликка эришиш учун, Фаластин давлатини 1967 йилги чегараларда ташкил топшига рози бўлишдан бошқа чораси йўқ...

Ҳақиқатан ҳам, Фаластин муаммоси, нафақат глобал араб кўчасида, балки салкам икки миллиардлик мусулмон дунёсида ҳам тарихий адолатсизлик сифатида қабул қилинади.

Бу ғарб учун ҳам ўта ноқулай ва қимматга тушаётган муаммога айланиб бўлган. Асосий масала – Исроил давлатининг инжиқ ва тажовузкор раҳбарияти бўлиб, уни Фаластин давлатига ён беришга кўндириб бўлмаяпти.

17 октябрь кунини Ғазода яна бир мудҳиш фожиа содир этилди. Бу ерда жойлашган шифохонага авиабомбалар ташланди. Оқибатда 800 нафардан ортиқ беморлар, шифокор ва ҳамширалар ҳалок бўлди ва жароҳатланди.

БИРЖА САВДОЛАРИГА ТАКЛИФ ЭТАДИ

Давлат активларини бошқариш агентлиги Фарғона вилояти ҳудудий бошқармаси маҳаллий ва хорижий инвесторларни давлатга тегишли бўлган қуйидаги акция пакетларини сотиб олиш бўйича биржа савдоларига таклиф этади.

Савдога чиқарилаётган давлат акция пакетлари тўғрисида қисқача маълумот:

Эмитент номи – "Қўқон нефтгаз пармалаш ишлари" акциядорлик жамияти (Фарғона вилояти, Қўқон шаҳар, Истиклол кўчаси, 63-уй);

Эмитентнинг фаолият соҳаси – нефт ва газ қудуқларини бурғилаш;

Давлат акцияларини савдоларга қўйиш санаси ва жойи – давлат акциялари 2023 йил 20 ноябрда "Тошкент РФБ" АЖда биржа савдоларига қўйилади;

Савдога чиқарилаётган акцияларнинг эмитент устав фондидаги фоизи – 51,0 фоиз;

Савдога чиқарилаётган акцияларнинг умумий сони – 33 424 896 (ўттиз уч миллион тўрт юз йигирма тўрт минг саккиз юз тўқсон олти) дона (оддий) акция;

Бир дона акциянинг номинал қиймати – 63 (олтмиш уч) сўм;

Бир дона акциянинг баҳоланиш қиймати – 1 316, 22 (бир минг уч юз ўн олти сўм йигирма икки тийин) сўм;

Акциялар пакетининг савдога қўйишдаги бошланғич нархи – 43 994 773 000 (қирқ уч миллиард тўққиз юз тўқсон тўрт миллион етти юз етмиш уч) сўм;

Савдо ташкилотчиси – "Тошкент РФБ" АЖ;

Лотлар сони – 1 (бир) та.

Биржа битими энг юқори таклифни тақдим этган талабгор билан биржа қоидаларига мувофиқ амалга оширилади.

Биржа савдоларига чиқарилган давлат акцияларини уларни савдога қўйиш нархи бўйича сотиб олишга икки ой мобайнида буюртманомга бўлмаган тақдирда, ҳар 15 кунда бошланғич савдога қўйиш нархининг 10 фоизи миқдоридан, лекин бошланғич савдога қўйиш нархининг 50 фоизидан паст бўлмаган ҳолда, савдога қўйиш нархини босқичма-босқич пасайтириш механизми қўлланилади.

Эмитентнинг охириги уч йил ичидаги молиявий-ҳўжалик фаолияти бўйича тўлиқ маълумотларни сотувчи, эмитент ёки инвестиция воситачисидан олиш мумкин.

Талабгорлар давлат акцияларининг сотувчиси ёки сотувчининг инвестиция воситачиси ҳамда эмитентдан давлат акцияларини сотиб олиш учун ўзи қарор қабул қилиши учун зарур бўлган қўшимча ахборотни сўраш ва олишга ҳақлидир, ўзининг хусусиятига кўра хизмат ёки тижорат сирини ҳисобланган ахборот бундан мустасно.

Талабгорлар 2023 йилнинг 20 ноябрдан бошлаб "Тошкент" РФБда биржа савдоларини ўтказиш Қоидаларига мувофиқ оммавий савдоларни амалга ошириш майдончаси (SPO) орқали давлат акция пакетларини сотиб олишга ариза беришлари мумкин.

Қўшимча маълумот ва саволлар юзасидан қуйидагиларга мурожаат қилишингизни сўраймиз:

Сотувчи: Давлат активларини бошқариш агентлиги Фарғона вилояти ҳудудий бошқармаси.

Манзил: Фарғона вилояти, Фарғона шаҳар, Алишер Навоий кўчаси, 17-уй.

Телефон рақами: 0373 244-29-61.

Электрон почта манзили: farg'ona@davaktiv.uz.

Веб-сайт: www.davaktiv.uz.

Сотувчининг инвестиция воситачиси: "Мулк-сармоя брокерлик уйи" акциядорлик жамияти.

Манзил: Тошкент шаҳар, Мустақиллик шоҳ-кўчаси, 107-уй.

Телефон рақами: 90 993-95-58.

Телефакс рақами: 0371 267-34-96.

Электрон почта манзили: msbu-depozitariy@mail.ru.

Веб сайт: www.ndvakt.uz.

Эмитент: – "Қўқон нефтгаз пармалаш ишлари" акциядорлик жамияти.

Манзил: Фарғона вилояти, Қўқон шаҳар, Истиклол кўчаси, 63-уй.

Телефон рақамлари: 73 542-25-15, 73 542-25-35.

Электрон почта манзили: kngpi@mail.ru.

Ҳурматли маҳаллий ва хорижий инвесторлар! Биржа савдоларида иштирок этишда ҳуқуқларингиз бузилган тақдирда, Давлат активларини бошқариш агентлигининг қуйидаги ишонч телефонлари орқали хабар беришингизни сўраймиз: (0371) 259-21-37, 1082.

Ўтказиладиган савдоларда омад ёр бўлишини тилаймиз!

Фарғона тумани, "Тинчлик" МФЙ, Ёшлар-обод кишлоғи, Марғилон кўчаси, 105-уйда жойлашган Ўзбекистон ҳаваскор ва профессионал Муайтай ассоциацияси Фарғона вилоят бўлимининг Фарғона вилоят адлия бошқармаси томонидан 2010 йил 4 февралда 341-сон билан рўйхатдан ўтган Низом ва маълумотномаси йўқолганлиги сабабли **БЕКОР ҚИЛИНАДИ.**

**"ФАРҒОНА ҲАҚИҚАТИ" ГАЗЕТАСИ МУХБИРИ ДАВЛАТЖОН ПОЛВОНОВ
ХИТОЙ ХАЛҚ РЕСПУБЛИКАСИДАН ХАБАР БЕРАДИ**



Алоҳида таклиф доирасида мамлакатнинг энг тез ривожланаётган шаҳарларидан бири – Сяньянга ташриф буюрдик. Қулай географик жойлашув шаҳар урбанизациясини жадаллаштирди ва ҳозирда у энг йирик логистика марказларидан бирига айланди. Масалан, божхона қонунчилиги бўйича алоҳида энгилликлар берилган "Сяньян" эркин савдо ҳудудида 44 та корхона фаолият юритса, уларнинг 12 таси чекланмаган муддатга божхона тўловларисиз юк сақлаш билан шуғулланади. Яна 22 та корхона юкларни дунёнинг исталган нуқтасига аниқ ва ишончли тарзда етказиб беради.

ТАМОЙИЛ МАҚСАДИ – ИНСОНЛАР ҲАЁТИНИ ЯХШИЛАШ

Умумий майдони 2 км.квadrat бўлган ва 2,2 минг иш ўрнига эга ушбу ҳудуд "Cainiao smart logistics network limited" компаниясининг ҳам иқтисодий тараққиётида муҳим аҳамият касб этди. Дунёга машҳур "Alibaba" компанияси ташаббуси билан 2013 йилда ташкил этилган "Cainiao" ўтган 10 йил давомида халқаро миқёсда шуҳрат қозонди. Ҳозир ушбу компания логистика фаолияти бўйича дунёда тўртинчи ўринда бормоқда.

Компанияга тегишли юк сақлаш омборларини кўздан кечирар эканмиз, ишчилар ҳаракатидаги аниқлик эътиборимизни тортди: ҳар ким ўзига юклатилган вазифани алоҳида эътибор билан бажармоқда. Кунига ўртача 3 минг дона жўнатмани қайта тайёрлаш ва тегишли манзилга юбориш ишчилардан катта масъулиятни талаб қилади. Айтишларича, омбордаги оғир ишларни автоматлаштирилган тизимга ўтказиш бўйича амалий ҳаракатлар аллақачон бошланган. Келгусида 25 та махсус робот бундай ишларни инсон иштирокисиз бажарадиган бўлади.

"Дунёни фаровонлаштириш орқали инсонлар ҳаётини яхшилаш" тамойилига амал қилувчи йирик ишлаб чиқарувчилардан бири – "Dongfeng cammins Injine Co. LTD" компанияси транспорт воситалари учун 100 дан ортиқ турдаги двигателларни йиғиш билан шуғулланади.

У 1987 йилда ташкил этилган бўлиб, 1996 йилда АҚШнинг "Cammins" компанияси билан ҳамкорлик ўрнатди ва ўтган 36 йил давомида 4 миллион донадан зиёд двигателни дунё бўйлаб буюртмачиларга етказиб берди. Жорий йил учун ҳам режалар чакки эмас: 180 минг

лантириш жараёнлари барча учун қизиқ, албатта. Ўсмирлик давридан буён чой етиштириш билан шуғулланувчи Хуан Шанхуй сулоланинг 12-вакили. У бутун умрини айни соҳа билан боғлаган – ҳар йили 50 тоннага яқин олий навда



дона двигатель ишлаб чиқариш ҳамда реализация қилиш кўзланган.

Чой – мамлакатнинг ташриф қоғози ҳисобланади. Бу заминда чойни миллий қадрият, кўп минг йиллик анъана ва яна, ифтихор рамзи сифатида қадрлайдилар. Адоксиз тоғ ёнбағирларида ястаниб ётган чой плантацияларини парваришлаш, чой барглари бетақроқ ва хуштаъм маҳсулотга ай-

қой тайёрлаб, Малайзия, Сингапур, Россия, Буюк Британия ва Япония каби дунёнинг энг кўзга кўринган давлатларига экспорт қилади.

Уста-чойчи ўз ишини шу қадар севадики, ҳатто Чой музейини ҳам ташкил этган. Бу ерда 2001 йилдан буён ҳар йили тайёрланган чой намуналари қадоқланган ҳолда сақланади. Шунингдек, барчаси чой ҳақида ҳикоя қилувчи 8 мингдан зиёд китобни ўзидан жамлаган кутубхона ҳам мавжуд.

"HOLA FUJIAN": КЕНГ ҚАМРОВЛИ МЕДИА-ГУРУХ

Фуджиан телерадиокомпанияси билан танишув биз журналистлар учун жуда таассуротларга бой бўлди. Мазкур телерадиокомпания 2004 йилда ташкил этилган бўлиб, ўтган вақт давомида телевидение, кино ишлаб чиқариш ва тарқатиш, шунингдек, янги медиа-тармоқларга ихтисослашган кенг қамровли медиа-гурухга айланди. Айни пайтда унинг таркибида 10 та телеканал (уларнинг 2 таси сунъий йўлдошга эга), 7 та радиоканал, ҳар ҳафта чоп этиладиган журнал-газета ҳамда кўплаб интернет сайтларини ўзида бирлаштирган.

"HOLA Fujian" деб аталади. Ушбу платформанинг 6,46 миллион обуначиси мавжуд ва улар "Molimoli", "Mark-follov", "Smile" каби ўнлаб кўнгилочар дастурларни тўғридан-тўғри кузатиб боришлари мумкин.

– Биз, асосан, Фуджиан провинциясига оид янгиликлар тайёрлаймиз ва тарқатамиз. Шунингдек, ҳудуд тарихи ва маданиятини ўзида ифодалаган бадиий лавҳалар, ташқи ва ички сайёҳлик кўламини оширишга хизмат қилувчи дам олиш дастурлари ҳам ижодий "меню"мизни бойи-тади, – дейди медиа-гурух директори ўринбосари жаноб Чжао Лин.

Фучжоу шаҳридаги IT компаниялар, жумладан, "King Long" эркин иқтисодий зонаси ва автофирмаси фаолияти билан ҳам танишдик. Ушбу корхона "хавфсиз шаҳар" тамойили асосида замонавий дизайн, энерготехмакор тизимлар ҳамда сунъий интеллектга эга жамоат ва махсус транспорт воситаларини ишлаб чиқармоқда.

"King Long" автобуслари билан айни пайтда Тошкент шаҳри аҳолиси ва меҳмонларига хизмат кўрсатилаётгани, Фарғона вилояти ҳоқими Хайрулло Бозоровнинг шу йил 11-18 сентябрь кунлари Хитойга ташрифи чоғида вилоят маъмурий марказида жамоат транспорти хизматини такомиллаштириш учун айни русумдаги автобусдан 70 дона харид қилиш бўйича дастлабки келишувга эришилганини алоҳида таъкидлаш зарур.

Марказнинг алоқа департаменти директори жаноб Танг Женью ҳамкор мамлакатлар соҳа ходимларининг бу каби тажриба алмашиш амалиётлари ҳар икки томон учун ҳам манфаатли бўлишини урғулади.

<p>МУАССИС: «Farg'ona haqiqati» va «Ferganskaya pravda» gazetalari tahririyati</p>	<p>2021 йил 18 августда Ўзбекистон Республикаси Президенти Администрацияси ҳузуридаги Ахборот ва оммавий коммуникациялар агентлиги Фарғона вилояти ҳудудий бошқармасида 12-001 рақами билан рўйхатдан ўтган.</p>	<p>Бизнинг манзил: 150114, Фарғона шаҳар, Сохибқирон Темур кўчаси, 28-уй.</p>
<p>Бош муҳаррир: Рустам ОРИПОВ.</p>	<p>Газета "Полиграф-пресс" МЧЖ босмаҳонасида таҳририятнинг оригинал макети асосида офсет усулида А-3 формат (8 саҳифа)да 1936 нусхада чоп этилди. Буюртма № 657. Босмаҳона манзили: Фарғона вилояти, Марғилон шаҳри, Тўрқистон кўчаси, 236-«б» уй.</p>	<p>Бош муҳаррир қабулхонаси: (факс) 73 226-02-70. Реклама ва эълонлар: 73 226-71-24. Саҳифаловчи: Илҳомжон Жуманов. Босишга топшириш вақти: 18.00. Топширилди: 16.30.</p>